



KMD

Vår ref.: 16/152-1/ BNE
L.nr.: 16/1872

Dykkar ref.:

Arkiv: K1 - 103
Dato: 01.03.2016

Høyringsvar til nytt inntektssystem for kommunane

Hyllestad formannskap handsama høyringsnotatet i møte 25.2.2016, og har følgjande innspel:

Hyllestad kommune meiner at det er feil at endringane i inntektssystemet favoriserer dei store kommunane på bekostning av små kommunar.

Dernest må vi ta avstand frå motivet bak dette endringsframlegget, som utan tvil er å presse fram "frivillige" kommunesamanslåingar gjennom økonomisk tvang. Samtidig skjer dette under eit sterkt tidspress som inneber at kommunane skal bli tvinga til å gjere sine vedtak utan å ha fullt oversyn over heile sakskomplekset. Vi noterer oss òg at dette presset først og fremst er verknadsfullt mot mindre kommunar i distriktet, rett og slett fordi dei endringane som blir prøvd innført ikkje inneber store økonomiske nedtak for større kommunar i sentrale strøk av landet. Bortfall av basistilskot blir lettare å bere di større kommunane er, i tillegg til at inntektssystemet elles forfordeler slike kommunar. Vi registrerer og med uro at Regjeringa på fleire måtar ynskjer å forsterke denne profilen.

Vi har vidare registrert at Regjeringa arbeider med to andre element som forsterkar denne politikken. For det første ynskjer ein å gjeninnføre kommunale selskapsskatt, som først og fremst vil komme dei skattesterke kommunane til gode. I tillegg ynskjer ein å heve skattedelen i dei kommunale rammeoverføringane, noko som vil dra i same retning. Hyllestad kommune ønskjer ikkje at skatt utgjere ein større del av rammeoverføringane. Hyllestad kommune går imot gjeninnføring av kommunal selskapsskatt.

For å skape føreseielege rammar for tenestetilboda til distriktskommunane er det viktig at basistilskot, småkommunetilskot og distriktstilskot må oppjusterast for og imøtekomme utgiftene. Kostnadane med spreidd busetnad blir ikkje tilfredstillande avspegla i dagens inntektssystem. Hyllestad ønskjer at det blir utvikla kriteria som betre vil måle kostnadane. I tillegg til avstandskriterium kan tal meter kommuneveg per innbyggjar vere eit slikt kriterium.

Vi er samde i at delkostnadsnøklane for barnehagane vert basert på heiltidstilsette og at barnehagegruppa vert utvida til 1.-5. åringar.

Med helsing

Bente Nesse /s/
Rådmann

Telefon: 57789503